

11 OCT 2000

Gus Dur-Lawatan

GUS DUR LAKUKAN LAWATAN KERJA DUA HARI KE LANGKAWI SELASA INI

KUALA LUMPUR, 11 Okt (Bernama) -- Presiden Indonesia Abdurrahman Wahid akan melakukan lawatan kerja selama dua hari ke Langkawi pada 17 dan 18 Okt untuk mempertingkatkan lagi hubungan Indonesia-Malaysia.

Pemangku Menteri Luar Datuk Seri Najib Tun Razak berkata semasa lawatan itu, Abdurrahman akan mengadakan pertemuan dengan Perdana Menteri Datuk Seri Dr Mahathir Mohamad dan kemudian mengetuai delegasi masing-masing untuk mengadakan perbincangan.

"Kedua-dua pemimpin dijangka bertukar-tukar fikiran dan pandangan mengenai isu-isu serantau dan antarabangsa membabitkan kepentingan bersama," katanya dalam satu kenyataan yang dikeluarkan oleh Wisma Putra hari ini.

Isu-isu membabitkan kedua-dua negara yang dijangka dibincangkan ialah mengenai pengambilan pekerja Indonesia, pendatang tanpa izin, perdagangan dan pelaburan dua hala.

Isu berkepentingan bersama yang dijangka disentuh oleh kedua-dua pemimpin ialah Mesyuarat Asia-Eropah (ASEM III) di Korea Selatan (16-23 Okt), Sidang Kemuncak Tidak Formal Asean ke-4 di Singapura (24-25 Nov), Mesyuarat Kerjasama Ekonomi Asia Pasifik (APEC) di Brunei (10-16 Nov) dan Pertubuhan Persidangan Islam (OIC) di Qatar (7-14 Nov).

Abdurrahman akan diiringi isterinya Ibu Sinta Nuriyah, 50 anggota delegasi yang terdiri daripada para pegawai kanan kerajaan Indonesia dan 15 wakil media Indonesia.

Lawatan itu bersempena persetujuan pemimpin kedua-dua negara untuk mengadakan perbincangan enam bulan sekali bagi mempereratkan hubungan dua negara jiran terdekat itu.

-- BERNAMA

MNY AHH FAZ